



# Ča - more - judi

11



Hana N.





**Ča - more - judi**  
**11**

*Nakladnik*  
OŠ Grohote  
Grohote, Šolta

*Za nakladnika*  
Ivan Tokić

*Urednik*  
Dragana Đurić

*Likovni urednik*  
Anica Bašić

*Grafičko i likovno oblikovanje*  
Dragana Đurić

*Računalna obrada*  
Dragana Đurić

*Slika na omotu*  
Hana Novaković, 6.r.

*Naklada*  
400 svezaka

*Tisak*  
OXA d.o.o

CIP - Katalogizacija u publikaciji NSK

ISSN 1845-4852

# **Ča - more - judi**

**Zbornik čakavske poezije učenika  
osnovnih škola Splitsko-dalmatinske županije  
11. pjesnički susret**

**Nečujem 24. travnja 2009.  
u povodu 19. Marulovih dana  
i  
očuvanja stvaralaštva na čakavskom narječju**



**Grohote  
OŠ Grohote 2009.**





***Ipak, Muze,  
molim vas od sveg srca,  
molim Febe, i Tebe, što si  
nekoć  
mojoj pjesmi svečanoj dao  
strune  
i nadahnuće....***







# **POEZIJA**

*Iris Mihovilović: Zid, 8.r., OŠ Grohote*





**OŠ Bijaći,**

**Kaštel Novi**



*Paola Grbić : Riba, 8.r., OŠ Grohote*





## MAŠKARE U KAŠTILIN

Višćice, ovce, koze i tovari skaču po rivi  
zvonu in zvonca i praporci,  
čuju se bubnji i trube,  
konji vuku karocu s krajicon.  
Povorka gre rivon.  
Krnje je velik ka kuća,  
ne more štradon proć.

Skupija se svit,  
smije se i viče,  
utorak je prid korizmu,  
danas smo svi maškare.

Niki su bumbari, niki lipotice,  
Crvenkapice i patujci,  
rokeri i darkeri,  
oni iz vrtića i skule,  
Sve je lipo, ne more boje.  
Matere nas doma čekaju s fritulan.

*Ana Čagalj, 8. r.,  
Mentor: Jelena Ljubić*

## **BABA MOJA**

...vavik ronza,  
ma dobra je ona!  
Lipo me svituje,  
Uči me da činim dobro.

Baba moja vavik mi govori  
da je skula u životu puno bitna  
jerbo je ona to  
na svojin kostin oćutila.

Pripovida mi da je njon  
bilo puno teže nego  
šta je sad nan i da zna  
da ću se uvijek sitit  
njezinih štorija i  
da ću i ja tako svojon dicit  
pripovidat...

...puno volim svoju babu.

*Dolores Jurić, 8.r.  
Mentor: Jelena Ljubić*

## **BRAT I JA**

Svi govore:  
"Jo, ča je mali, baš je smišan..."  
A niko ne zna  
da on mene luda,  
smanta u roku odma,  
bratski tuče i  
za kosu vuče.  
Jema toga još, a kad bi počela,  
Ne znan kad bi stala.

*Tea Mateta, 8.r.  
Mentor: Jelena Ljubić*

## **PENŠIJUN**

Moji  
baba i did  
u Gornjin Kaštilin  
živedu.

Did  
na pijacu gre  
pa do po bota,  
stoji,  
a baba bidna  
nad špakeron  
delicije  
kuva.

Na trešete i briškule  
dvi, tri partije  
did  
sa susidon svojih  
baci.  
A baba sama  
slaže  
pasijans.

Moji baba i did  
u Gomilici  
pod Kozjakon  
živedu.

*Nikolina Baričević, 6.r.  
Mentor Lucija Carev*

## **ČA JE, JE**

U skuli asa dobijen  
Pa se pitan:  
„Ča će mi to?!“

U don Ćira para iskan  
Pa se pitan:  
„A ča će mi to?!“

O ponoći moja mriža  
Iz mora škovace uvati  
pa i ja u more vratin i rečen:  
„A ča mi je i to tribalo?!“

A ka me baba šibon po kostiman takne  
S tugon u očiman kažen:  
„Ča je, je! Zaslužija san!“


*Marija Magdalena Grgin, 6.r.  
Mentor Lucija Carev*

## **KOME REĆ?**

Kažu da san puno bistar,  
Ali da san malo živ,  
Da mogu puno boje,  
Ali da ne učin.  
I kad sve znaju,  
Ča mi mater stalno zovu,  
Ča sad ona ima s tin?  
Jer u mojoj glavi je ništo  
Ča ni ja ne razumin.  
A kome da rečen  
Kad nikome ne vajan,  
Kad više nisan dite malo,  
A bome nisan još ni naresta?

*Vice Mateta, 6.r.  
Mentor Ivanica Debak*





*Paola Grbić, 8.r., OŠ Grohote*

## **NAPUŠTENA BARKA**

Napuštena stara barka  
Ča more je izbacilo u valu.

Ribara na njoj nima,  
Mriža joj zgropana.  
Umorna i pospana,  
Sića se mora  
I riblji jata.

Prošlo je vrime  
I puste plime,  
Barku zgotovilo  
I mrižu u vali ostavilo.

*Marija Matijaš, 5.r.  
Mentor: Ivanica Debak*

# OŠ Bol, Split



*Ivana Čudina : Riba, 8.r., OŠ Grohote*



## **PRVOŠKOLSKA BROJALICA**

Jen- dva-tri  
Gori ruke svi.  
Četri-pet  
Na prste se uspni  
Ka da je balet.  
Šes-sedan-osan  
Znaš li ko san?  
Devet-deset  
Sad u krevet.

*Emerciana Alfirević, 1.r*  
*Mentor: Blanka Ljubenkov*


## **MAČKE U DVORU**

U mom dvoru uvijek mjauču mačke. Umuknu kad  
dođe šjor Pjer.  
Lizu mu oko noga.  
Idu za njen jer in nosi jist. U stari pjat stavi  
drače i glave od ribe.  
Mačke sve izidu. Popenju se na parkirane aute.  
Tu leže na suncu. Čekaju da prođe dan.

*Marijan Kurtović, 1.r*  
*Mentor : Blanka Ljubenkov*







*Jelena Brković : Riba, 7.r. , OŠ Grohote*



## LITNJE BUĐENJE

Tuče zvono kampanela,  
Mater otvara ponistru,  
bava bala po mojoj kamari.  
Gren malo na balun.  
U po bota na obid.  
Žega, nikoga nima.  
Samo vonj frigane ribe.  
Ostala sparina,  
muk u kaletama.

*Dominik Ćurković, 5.r.  
Mentor: Mary Brkljača*

## MOJ SRITNI ŠKOJ

Hvar je škoj moje sriće  
tu san sa svojim brodon  
i svojom kočon  
sama sa svojom ticon  
ča mi čini ladovinu.  
On je moja lanterna  
ča mi svitli,  
piturana bojom lavande  
i vonjom rodne kuće.  
Čeka na me  
moje malo misto  
iz 1001. noći.

*Magda Kuzmičić, 6.r.  
Mentor: Mary Brkljača*

## **MOJA PONOS I DIKA**

Jutro je arivalo.  
Virin kroz ponistru, gledan u more.  
Bonaca je ka uje na pjatu,  
vapori partidu prema škojima.  
Galebova jato u letu  
nad mojin gradom.

*Mia Maretić, 5.r.*  
*Mentor: Mary Brkljača*

## **SPLITE, JAVI SE**

Gren priko pazara, dođen na Peristil,  
produžin priko pjace,  
burdižan Marmontovon,  
nigdi žive duše.

A ča je ovo?

S Prokurative gledan more,  
dođen do rive.

Nigdi nikoga.

Zaderen se iz svega gučka

Splite moj, javi se,  
di si nesta?

Di su tvoja lipa dica,

mladost ča šeta,

peškaruše i kupravende,

penšjunati na šentadan?

Nima moga Splita.

Deboto mi je srce stalo

kako živit brez njega.

Na sriću žveljarin zazvoni

Skočin iza sna

počirin kroza škure

i vidin moj Split

kako me čeka.


Ala lipote!

*Vaniglia Smoday, 6.r.  
Mentor Mary Brkljača*

## MOJ GALEBE

Letiš rivot, milina mi se vata oko srca,  
gledan te kroz škure,  
gubin sat matematike.  
Ne obadajen jer ćutin slobodu  
i ne fermajen te gledat.  
Volila bi letit, moje galebe  
bit slobodna  
ne žalit se nikome  
ne ić na živce nikome.  
To je moj san oduvik.  
Raširimo krila  
pobignimo na jug  
moj galebe.

*Vaniglia Smoday, 6.r.  
Mentor: Mary Brkljača*



*Paola Grbić, 8.r., OŠ Grohote*



## FALI MI STARI SPLIT

Fali mi tvoja kamena riva,  
stara Matejuška s vonjon friškine.  
Ča će mi ovi niki moderni svit  
ča čini falšin moj Split.  
Splate, di si, vrati se  
Splate, fališ mi.

*Ana Šeparović, 8.r.  
Mentor: Mary Brkljača*



*Gina Bilankov : Soltanski dvor, 6.r. OŠ Grohote*




## **MLADI OSMIJEH MOGA SPITA**

Kad otvorin ponistru i pogledan na Split  
Znan da nima ničeg lipjega od tega.  
Odozdal čujen glas moje prijateljice,  
A odozgar me sunce pozdravja.  
Znan da Split svima daje osjećaj ponosa  
Ča smo njegovi i ča ga furešti vole.  
A ča je lipo sidit na šentadi na rivu,  
čutit vonj staroga grada,  
gledat igru dice ča mome Splitu  
darije mladi osmijeh.

*Lucija Vojnović, 5.r.  
Mentor Mary Brkljača*

# OŠ Grohote, Grohote



*Tina Sule : Riba, 6.r. OŠ Grohote*



## MOJ SAVRŠEN SVIT

Ima jedna rič  
koja ni lažna.  
Ta rič je mira i dobrote važna.

Ta jedna rič  
moj savršen svit ulipšava.  
Ta rič moj svit stvara.

Taj moj svit bi bija lipši:  
pun zdravja, jubavi i dobrote,  
a dica bi bila sva od lipote.

Dica bi jubav učila ka predmet,  
bonton bi ponavjala napamet.

Taj svit bi blista od sriće.  
Ukinile bi se sve nesriće.  
Ne bi bilo siromašnih ni bidnih.  
Bilo bi samo zdravih i veselih.

Odrasli bi posal dobivali  
i plaću zarađivali.  
Sve bi bilo u cviću i šarenilu,  
a sve crno i tužno nestalo bi u  
plavetnilu.

Onaj koji bi zlo činija  
odletija bi s moga svita.

Ima jedna rič  
koja svit bi mogla spasit,  
a to je jubav koja  
moj savršen svit će ukrasit.

*Nina Alajbeg, 6.r.  
Mentor : Mirjana Stanić*

## **BISER JADRANA**

Šolto, mali si otok, a u mome srcu najveći.  
Protiv tebe ne more meni niko ni rič reč.

Volimo tebe svi jer poput bisera si ti,  
a to će potvrdit i turisti koji će te opet doć vidit.

Kad lito dojde još lipja si ti  
sva si od sunčanog zlata, jedina ti.

Zato tribate znat svi :  
da je ovi otok di se sadi maslina, vinova loza i cviće  
za jude dobre voje pun mira i sriće.

*Ankica Braškić, 5.r.*  
*Mentor : Mirjana Stanić*

## ŠOLTA

Kad Avlija, najlipši šoltanski dvorac, marende pravi  
Maslinica ih smlavi.

Donje Selo uvijek tiho, nima dice  
da jidu kroštulice.

Srednje Selo uvijek mirno, nima tuče,  
nima vuče.

Groćani jemaju sriću  
ča in do Božića blagdane miću.

Rogač svake godine jema sriću jer jema rogača  
i pivača.

Nečujem priko lita pun turista,  
a kad dojde zima nima ništa svita.

Gornje Selo procvitalo  
kad je popa potiralo.

Stomorčani morski vuci  
ne pridaju važnost luci.

Ovo van je Šolta moja.  
Vridilo bi da je malo boja.

Šolto moja slušaj ovo:  
ja te volin i gotovo!!!

*Rosana Prvinić, 5.r.  
Mentor : Mirjana Stanić*







*Hana Novaković : Riba, 6.r. OŠ Grohote*



## **FORTICA**

Droga moja Fortica, prova si  
lipotica! Kad su gruba vrimena  
bila, Forane si obronila!

Nikad te nismo zaboravili, niti  
te somu ostavili. Uvik smo ti  
kumpaniju činili, i kad nismo  
blizu tebe bili.

Još i danas lipo stojiš Gledoš  
na For i mučiš Pri se kod tebe  
bižalo od nevoje na svu sriću,  
sad je boje!

Droga moja Fortica, ti si non  
provi dor. I kad je, i kad ni  
muke, Čuvaj mi moj For!

*Bisera Jurić, 7.r.  
Mentor: Marinela Sarić*

## **KAIĆI**

U mandraču lipi kaići.  
Kad su bote, toncodu, letidu kako  
košići!  
Riborima potežedu mriže.  
Jugo hi nosi i diže.

Kaići po moru kako fjuba u vlose.  
Vitar i kurenat kolo otoka hi nose.  
Kaići u mandraču - kako tićice na  
groni. Bit na more u kaiću - ninder  
lipjeg ni!

*Bisera Jurić, 7.r.  
Mentor: Marinela Sarić*

## **MOLO GROBJE**

Nojlipje molo misto, a bez  
svojih vridnih judi!

Još se uvik čuti vonj  
uja, ognja, divjega zeja I  
levonde.

Ne čuje se već kampanel, ni  
dičji smih, ni plač.

Pobigli su judi u boji život,  
a ni što hi vuče i zove da  
ne zaborave svoje Molo Grobje!

*Ive Tudor, 7.r.  
Mentor: Marinela Sarić*

# OŠ Lučac, Split



*Darija Popović: Riba, 6.r. OŠ Grohote*



## **SNIG**

Probudila san se u Splitu, parilo mi se ka  
u niken drugen svitu. Snig je bija na moju  
ponistru i na nonotovu brnistru.

Bura je zapinila more i fermala  
vapore. Škoji su nan ostali  
u daljini, u toj prilipoj divjini.

Palme na Rivu su obukle  
košuju bilu, a Mosor i  
Biokovo vinčanicu cilu.

Skule su ostale puste. Dok su  
padale pahuje guste.  
Moj topli Split u ti je dan zimskon  
čarolijon bija okupan.

*Antea Hrepić, 5.r.*  
*Mentor: Ankica Kvartuč*







**OŠ Majstora Radovana,  
Trogir**



*Jelena Brković : Riba, 6.r., OŠ Grohote*





*Paola Grbić, 8.r., OŠ Grohote*

## **CA - JAZIK MATERE**

Bati skura, vitar puse.  
More pini.

A s ponistre mati vice:  
„Dojdi doma, dite moje!  
Nevera ce priko skoja!”

Cujen rici materine  
Cujen rici kroz vikove  
Jerbo u meni rebatije

-Ca-

Ric matere,  
I mater jazika.


*Đana Belas, 5.r.  
Mentor: Marija Lučin*



## MOJ BROD

Ca ja volin svoj brod!  
Lipi brod!  
Bile boje.  
Galeb bili.  
Vežan u portu maloga mista,  
Imena bistra.  
Brod stoji, a more se mice.

*Đana Belas, 5.r.  
Voditelj - Marija Lučin*



*Paola Grbić, 8.r., OŠ Grohote*

**SKALINADA**

SKALA OD DRIVA.      **TEPLA.**

SKALA OD STINE.      **LADNA.**

SKALA OD PINE.      **MEKA.**

SKALA OD NADE.      **LANTAVA**


SKALA OD KATRANA.      **TESKA.**

SKALA? MOJA?  
LANTERNA, BUŠULA, BRENZA...

*Sara Belas, 8.r.  
Mentor: Tihana Mamut*







*Paola Grbić : Riba, 8.r., OŠ Grohote*



## JUŽINA

Don za donom gre.  
Vrime nam biži  
svršetak i ovega godisća  
sve nan je bliži.

Niko su se čudno  
vrimena zaredala  
tepli vitar donima mloti  
misto da je bura zatriskala.

Ludo se jugo  
puhat ulovilo  
po je ve svima  
glovu poludilo.

U konobu se zavuklo,  
pod volat se provuklo,  
na prste se propelo  
na vrh čempresa se uspelo.


Moloj brodici  
jorbul je slomilo  
po sad bidan visi  
ko tiću ranjeno krilo

Južina se razmohala,  
suho lišće s gron otpuhala,  
prema oblocima je odlutala  
i žestoki rock'n'roll zabalala.

Ćipkon od morske pine  
valu je obrubila,  
a onda se na momenat  
u dubini izdubila.  
Cvili jugo  
jauče i stenje,  
s teškon mukon  
na kampanel se penje.

Na somi samcoti  
vrh je silo  
i na cili glos  
zavijat počelo.

Judi se u čudu pitoju  
kuda ovo vodi  
jer in većim  
jugo strošno škodi.



*Paola Grbić, 8.r., OŠ Grohote*

Jedni aspirine za glovu piju,  
drugi se ko ludoci smiju,  
trećima se u pivonje dolo,  
a nikima se teško, teško  
zaspolo  
Stori judi govoridu  
da je sve to zbog nerednega  
živjenja  
a oni sa velin skulima tvrdidu  
da je to zbog globalnega  
zatopljenja.

Jo sa tim neću glovu razbijat  
niti ću se puno poludivat;  
jer još se nikad ni dogodilo  
da ono ća počelo ni i finilo.

Tako će siguto  
i sada bit  
po će za koji don  
fermat puhat i dažjit.

Umeto će nan se rodit ditić.  
Po van ve sada želin  
sritan i blagoslovjen Božić.

*Leo Trevižan, 8.r.  
Mentor: Dubravka Menjak*

## **VOLIN TE, MA**

Će bi još moga  
o svojoj materi reć,  
a da to pasonih godišć  
nison roka već?

Napiso san o njoj  
lipih rići vagun,  
ma nikad nison spomeni  
da ludo volin balun.

Kad god može  
na utukmice gre  
dok mu iz očiju sjoj izbije,  
a iznutra sva kuho i vre.

U našoj kući  
za Ajduka navijemo svi,  
ma niko ka ona  
tako žistok ni.

Skoće, više, pivo  
i u temu uživo.

Kad Ajduk slabo igro  
i kad mu ne gre nojboje,  
ona van ne odustaje  
i ni slabe voje.



Nos dicu želi naučit  
da u životu vajo znat i gubit;  
jer di bismo završili  
kad bi sve bilo kako bismo tili.

Volin svoju mater  
volin jer je takova,  
volin njezinu dobru voju  
I ajdučku bilu boju.

I zato mu želin reć  
jedno veliko fola  
za sve ono će mi doje  
i će mi je dola.

A kad ve od dvo sina  
nijedon ni posto balunjer,  
neka nu baren za koje godišće  
balun zaigra ćer.

*Leo Trevižan, 8.r.  
Mentor: Dubravka Menjak*




*Paola Grbić, 8.r. OŠ Grohote*





# OŠ Pučišća, Pučišća



*Petra Bezić : Riba, 8.r., OŠ Grohote*



## VĪLÀ OL JÀDRANA

Tô lipotica  
Pol vrilin sũncen  
Balô bosà.  
Vèšta non u bũžima  
A onà – nasmĩjona čelà.

Zaškarpũnili se  
Cùri obrãzi.  
Ventulô se  
Tõnkon ručicon.  
Vãmo-tãmo  
Po žòlù gãzi.

Muôru je ukrèla lipotù  
I smĩh ditètu.

Čũvo vĭlà Jàdran cĩli  
Čũvo svãki pièdaj žòlà  
Stĩnu bĩlu, blokèt vrili  
Dìvji krš i dãske s mùlà.

*Karla Drpić, 7.r.  
Mentor: Marita Lasić*

## U NÒNINEN ŠKAFÈTU

U mojiẽ nòne škafètu  
svèga – kô u nòjvećen  
markètu:  
šudarići, bracolèti,  
krùnice i Ōntè svièti.

Probužòne kalcètice  
ol nòs diciẽ.  
Puô botùnà,  
trî šuštîne,  
dvô retāja ol koltrîne.  
Zòkrpa  
ol pròve kòže  
za – nè doj Bòže!

A pol svĩn tĩn  
leži slika  
ol gòdišć požūtila  
i ol sūz se  
raskrōvila.  
Jedôn  
čẽ muôren plovĩ  
bĩ je rèko  
da je vòli.  
Obecô je:  
bit će svāco!  
A išo je i  
– nĩ se vrāco.

*Ani Nižetić, 7. r.  
Mentor: Marita Lasić*

## ŠĀKA ZEMJIĒ

Kal je Buôg  
Pučišća stvōrô  
Nī se pūno  
Uôn zamōrô.

Pròsu je  
Šāku zemjiē.  
Ūz more čà drće  
Nastivô kaiće.  
I dōve būru  
Čà mandejô sīce.

Dòdo šāku stīniē.  
U svāken komīnù  
Stāvi  
ògonj da gorī.  
I gomīlu u gorī  
Da stojī.  
A na gomīli  
Kosīća  
Da pivo!  
Slūšojte mōlića!

Svè je zāsu  
Šākon zlôta.  
Zvonī stīnà  
Ispol mlôta.


A čovīku  
Če jè vrīdan  
Sômo ziêmju!  
Nekà rōdi  
Bīdan!

*Ani Nižetić, 7.r.  
Mentorica: Marita Lasić*





# OŠ Ravne Njive, Split



*Rosana Prvinić : Riba, 5.r., OŠ Grohote*



## **MOJE LIPO MORE**

Ča je lipo, ča je lipo to  
more modro, to more  
sinje. U njemu je sva  
lipota, u njemu je biser  
života.

Ča je lipo, ča je lipo  
na misečini obasjano,  
na suncu zlačano, od  
lipote satkano.

Ca je lipo, ča je lipo, od njega mi  
lipjeg nima, ono ribare šumom vala  
pozdravja, na obali i žalu sniva.

*Lea Bratić 5.r.  
Mentor: Daria Zlatar*

## **HVALA TI, MORE!**

More jubi nebo, grli  
stine. Sumi stare pisme,  
odmara na žalu...

E, lipo moje more!

Ti ča utapaš sunce,  
u tebi zore nestaju.  
Ti ča odnosiš moje snove,  
na neko daleko, skriveno misto.

E, lipo moje more!

Slana je stina  
na kojoj galeb sidi,  
spavaju trave, ribe i škojke  
ulovljene u mrižu zlatnoga miseca.

Mirno plovi barka,  
bez straja, a da očeš,  
moglo bi je potopit.

Lipo moje more, dobro  
moje more,  
hvala ti ča svoje bogatstvo diliš sa svima, ča svojon  
snagon ne topiš tvrdu zemju, ča nosiš mornara  
bez putokaza...

Ma, hvala ti more na svemu, hvala ti ča te ima!

*Hana Perković 5.r.  
Mentor: Daria Zlatar*



# OŠ Slatine, Slatine



*Mary Buktenica : Riba, 8.r., OŠ Grohote*



## MORE

Odan usamjen po svome mistu  
gledan barke di se vajaju u portu,  
jude kako idu na ribe.  
neki idu vidit jel in se ča uvalo u mrižu  
neki idu bacit parangal,  
a neki se praznih ruku vraćaju.

Volio bi i ja jednog dana živit s morem  
pa da moran odrišit sidra,  
nek me maeštral nosi,  
pa razapet jidra, brod na moru prkosi.

More, more  
srce te moje zove,  
plava bojo nebeska.  
pa unda zastanem  
i sitin se jedne stare pisme  
koju su naši didovi pivali  
prvo iliri, a posli Kelti.  
na ta je vrata i Bonaparte žejan kuca  
svi su mu se divili  
naše lipo Jadransko more.

*Leo Cipirita, 8.r.  
Mentor: Barbara Šuto*



## ŽIVOT JEDNOG TEŽAKA

Vr sela i brodica, nad ribarom težkon  
sunce se budi sviže  
pa gleda ča ribar parangal diže

Svoje lice umije u moru okupanon rosi  
pa gleda ča ribar u rukama nosi

Da je bidan cilu noć ribu lovi  
ina maeštralu i jugu, buri  
pa se ni umori...

Gleda mu teške na rukama žuje  
ča životnu štoriju pletu,  
ča su u životu prošle  
pa su dale neku štetu


I unda vitar svojon rukom  
budi jarbole lađa,  
i doli ribar plete mrižu mukom  
novo se jutro rađa...

A unda u daljini, kad nan sunce zađe,  
zamru i s njin i težačke muke i srce i  
lađe...

*Lucija Škrobica, 8.r.  
Mentor: Barbara Šuto*



# OŠ Split 3, Split



*Rosana Prvinić : Riba, 8.r., OŠ Grohote*



## **MOJA KALA**

Moja kala  
Nije mala i pirjasta  
Ka u starega  
Splita

Već je vela i basetna  
Moderna  
I u njoj živi  
Ma skoro...  
Ijadu svita

Ja je isto puno volin  
Jer u njoj  
Sa svon drugon dicon  
Svoje lipo  
Ditinstvo provodina

*Lucija Bonković, 4.r.  
Mentor: Linda Koncani*

## **DITE SPLITA**

Moj van je Split sunce Mediterana  
pripoznat još od cara Dioklecijana.

Puno je vrimena otada prošlo  
i niko je moderno doba došlo.

Nima više zoge, kareta na balinjere,  
ali se ovdje još uvijek svako malo  
iz ničega činidu fjere.

Ja sritno san dite Veloga Mista,  
i želim mu da zauvik u suncu blista!

*Lea Delaš, 4.r.  
Mentor: Linda Koncani*

## BIDNI TIĆ

Ča je tiću ča si smrša,  
oli ti je ovi mraz u kosti uša.

Bidni moj, puno mite žaj,  
ča nikome ne znaš vikat "Daj!"

Svi ti nekd jure, žure  
pa tebe zaudobe.

Ča ti ja mogu dat  
pa ovi dan ulipštat?

Digni glavu za dišpet svima  
brzo će biti gotova  
i ova zima.

E moj tiću, sad ću ti reć  
već će ova zima uteć.

Doći će sunce da nas ugrije  
pa ćemo svi zapivat:  
Evo litnje fantazije!

*Lana Galić, 4.r.  
Mentor: Linda Koncani*

## TIĆ

Fermala je zima,  
leđeno vrime ošlo.  
Iz toplih krajeva  
jato tica došlo.  
Na ponistru moju  
mali tić sletija,  
pismu mi otpiva  
i jopet odletija.  
Pismu tvoju čujen,  
tiću moj mali  
jol u poju, u vrtlu, jol u kali.  
A kad zima jopet dojde  
a tić moj u svit pojde  
faliće mi mići moj.  
Al' proliće  
i lito ovo cilo  
guštaću  
njegov lipi poj!

*Iva Kruna Bilić, 4.r.  
Mentor: Linda Koncani*



## RIČ PO RIČ

Rič po rič  
tavajola, pjat, perun  
i u teći brujet.

Rič po rič  
ponistra i na nj škure  
pisma iz kale, mladost vitrena.

Rič po rič  
rič blaga, rič gruba, rič šporaka.

Rič po rič  
maestral, bonaca,  
tramuntana, južina, nevera  
i bura bisna

Rič po rič  
ribar, galeb, gajeta i pučina.

Rič po rič  
kamen bili, maslina,  
smokva, rogač i drača,  
težak i tovar.

Rič po rič  
Život cili.

*Jakov Pavao Lelas, 4.r.  
Mentor: Linda Koncani*

## **SPLIT NA SV. DUJU**

Split van je judi  
najlipji grad na svitu,  
još kad je niki važni dan  
ka ča je Dan sv. Duje  
to van bude posebna fjera  
i velika fešta na rivi.

Na bancima se prodaju  
svakakve drangulije  
ka ča su: kuvače, klepetače, zjogatuli,  
košare, šareni baluni  
a na pazaru se moredunać  
i prve trišnje.

Svi Splićani dođu na rivu  
s dićicom se malo prošetat  
i udahnut mao onega pravega  
splitskega gušta...

A poslin obida dolzai ono najlipje  
a to je doć na rivu zaigrat tombulu,  
pa očete li osvojiti cinkvinu, tombulu  
ili ništa. zaprvi ni niti važno,  
važno je zabavit se i ubit vrime.

Zato judi, ako morete i  
ako imate vrimena  
svratite malo u nas, u Split  
na našu feštu,

pa recite: "Sveti Duje, ča te lipa fjera!"

*Petra Pulić, 4.r.  
Mentor: Linda Koncani*

## **STARA MASLINA**

Već dugo godin  
stoji tu na iston mistu  
lipa, ponosna, dišpeta puna  
maslina stara.

Sunce je mazi  
ka mater dite  
Ona jubav čistu nan daje  
grle nas njene grane  
obamiju se njene žile  
okolo naših noga.

Ona je ponos našega mista  
plodova krcata ona čeka  
Daje nan uje  
gusto i žuto.  
Maslinovo uje  
likarija čista!

*Dominik Romić, 4.r.  
Mentor: Linda Koncani*

## **MOJA NONA**

Gomilica je misto moje.  
Tu živi dobra nona moja.  
Na kantunu jon kuća.  
A moja nona u dvoru.  
Čisti blitvu.  
Dva piruna za večeru.  
U traverši čuva šaku  
suvih smokav.  
Za didu kad se  
znojan vrati iz poja.  
I neće mu dat  
vode napit se.  
Dok ne izi blitvu.  
Takva van je moja nona.  
Ona uvijek zna šta vaja.

*Mia Vujević, 4.r.  
Mentor: Linda Koncani*

## MOJ LIPI ZAVIČAJ

Ala gušta judi  
pivajte od sriće  
jer nan novi dan sviće  
i, možda, boje bit će.

Šjora Kate kroz ponistru viri  
a iz kužine se miris kave širi.  
Mora pojist na brzinu nešto,  
i u poje poč.  
Okopat verzot, krumpir i kavul  
pri vengo stigne noć.

Doli iza stine,  
zeleni se petrusimul i murtela,  
a zalit će fažolet i biže,  
zeje i špinača su nešto niže.

Barba Špiro nosi kašete,  
pa garifule u njih meće.  
Triba prodat, pineze zaradit,  
a ne se samo ispod drva ladit.

Skučajte, none drage,  
što ne znan više  
svih riči što ste govorit znale,  
kad ste u maštali bjankarije prale.

*Petra Urlić, 6.r.  
Mentor: Neda Lelas*

## **FJAKA**

Kad mene svitu uvati fjaka,  
sa ovega mista ne bi se maka.

Sve mi je fagot ća triba učinit:  
poć u skulu, libra se primit.  
Njanci za balun ni me brigat,  
ćaš govorit, ako triba štogod odvatigat.

Ća si čovik, ća si dite,  
ma kontra fjake ne moš svite.

*Karlo Jerončić-Grba, 6.r.  
Mentor: Neda Lelas*

# OŠ Vis, Vis



*Nina Alajbeg : Riba, 6.r., OŠ Grohote*





## NEVRIME

Kad je vodi nevrime  
aboj judi zime.  
Puše, kiši, lampo,  
bište judi, bit će pakol.  
Ko ne bado doma poč,  
nevrime će ga veselo noć.  
Ala judi ca će ga izremenat,  
posli svu šetemonu neće alavija  
spat,  
a i bolest će ga ćapat.  
Glete judi ca more kuho i pini  
i koja cuda po sikima cini.  
Svit vice kako na pazor,  
ma čak se ne vidi ni For.  
More obo sike tuce,  
kako da ih sebi vuce.  
Ali kako grubu vrime dojde  
isto tako i projde.  
Ucini se lipu vrime  
i već ni ni kiše ni zime.

*Tea Bunčić 5.r.  
Mentor: Srebrenka Beno*

## **DVI VALE**

Dvi vale, Viško i Komiško,  
jedna je bokun veća, jedna je bokun manjo,  
obe dvi su šesne i u obe je lipo.

Koja je bojo, koja je lipjo,  
uvik se svadidu Višani i Komižoni,  
ali je uvik mir i svi se pomožo.

Vamo smeto bura, a onamo garbin,  
vamo sviće raniji, a onamo kasniji,  
onamo guštaju u sutonu, a  
ovamo u suncu koje te budi rano.

To su te dvi vale koje se  
nadopunjijedu i ne mogu jedna  
bez drugi.

*Ivan Gazija 8.r.*  
*Mentor: Srebrenka Beno*

## **RIBORI**

Kad su vonka lipo vrimena  
ribori uvik gredu navigat.

Mriže butoju  
i ribe čapoju.

Digo se srići  
i mriže jedva vucu,  
a digo ni lova  
pok i mriže pucu.

Kad je misec pun  
na more ne gredu  
odmoraju se uz komin  
i kako maške predu:

Ni lako, judi, more mlotit  
i zato ribu tuko skupo plotit!

*Irena Ivičević 5.r.  
Mentor: Srebrenka Beno*

## **MOJ VIS**

Iz moje kuće se vidi,  
lipo viška vala,  
velo barda, gomile, fortice,  
lipe kuće i kolice.

A po moru koće brodidu,  
ružinove su i store,  
hitiju mriže i ribe lovidu  
sve do zore.


Sve to iz svoje kuće vidim,  
lipoti vale se divim,  
lipje vale na svitu ni,  
to mislim jo i Višani svi.

*Marino Lukšić 7.r.  
Mentor: Srebrenka Beno*

## NEVRIME

Bura puše i puše  
store polme se ruše.  
Vitar nosi sve ispri mene,  
nebo će zaplakot  
ol tuge, ca nevrime gre.  
Kako svi gredu doma  
tako je i va pisma gotova.

*Anamaria Marić 5.r.  
Mentor: Srebrenka Beno*



*Paola Grbić, 8.r., OŠ Grohote*

## STAGNA

Na škoju Visu ili ti ga  
Issi storoj Stagna je nojlipji pozicijun.

Nose vrimenta je moja Stagna  
puna svita bila.  
Nono mi je te stvori provjar znol,  
svaku bi štoriju jušto zašinjol.

I butihih je tote bilo  
kako bi se boji živilo.  
Sve od jutra pok do u noć  
plac dici i smih susidih mogal si noć.

A danas von moja Stagna  
prozna stoji.  
Malo storih, a još manji mlodih,  
somo teta Juba na ponistru stoji  
i ku paso ona mu broji.

I kad po Stagni pason  
žalost i tugu inkontron.  
Prozne kuće i mirine nahodin  
da bi me na pasonu vrime vroćalo  
i u sarce tugu stvaralo.





*Paola Grbić, 8.r., OŠ Grohote*

I radi tega svega  
jo svojo Stagnu volin  
neka kad pason sarce me zaboli,  
jer i moje ditinstvo na njoj se dogodi.

Baš takova napušćena i prozno  
nojlipji pozicijun za mene  
na škoju je ostala.  
Prozne kuće, prozne kole,  
sad je somo teta Juba ostala  
da bi starost Stagni zašinjala.

*Ileana Sablić, 6.r.  
Mentor: Srebrenka Beno*

## **MOJ NONO**

Kad dojde deseti misec  
on gre na štitice.  
Kad se vroti doma donese  
mi štitici za pušcat.  
Kad intron u konobu  
gardelini, frižolini...  
kantodu.

*Vinko Udiljak 5.r.  
Mentor: Srebrenka Beno*

## **MORE**

Svaki don gledon u njegove  
modre dubine,  
koje sežu u daljine.  
Gledon kako na vitru tonco,  
kako provje sa riborima.  
Gledon kako tuce obo sike,  
kako se pini.  
Gledon ga svaki don  
i divin se lipoti koju imo !

*Tina Vidović 5.r.  
Mentor: Srebrenka Beno*

**OŠ Vjekoslav Parać,  
Solin**



*Anton Burić : Riba, 8.r., OŠ Grohote*



## ČUJEN ...

Gre crna noć  
nad mojin gradon  
čujen  
neko se šuja kradon.

Savija i juja  
stare grane,  
na tlu već stojidu  
masline neobrane.

Lomi i krši,  
fijuče jako, jače  
isfrižanu lozu staru  
čujen  
osamjenu kako plače.

*Ema Milišić, 8.r.*  
*Mentor: Velimir Pašara*

## ČA JE BILO TEGA VIŠE NI

Gredu dani  
pasaju lita,  
ča je bilo  
tega više ni.

Osićan  
ditiñjstva miris,  
obuzima  
cilu valu.

Kroz ponistru  
gledan  
usnule kapi kiše,  
vidin  
u njima one  
ki nima više.

*Ema Milišić, 8.r.*  
*Mentor: Velimir Pašara*

## **TIŠINA**

Jutarnja tišina  
u plavetnilu mora  
pisma cvrčka  
u mirisu bora.

Stojidu sike  
šumoru moru,  
šumoru moru  
u zlatnu  
jutarnju zoru

Tišinu prikine  
galeba krik,  
ribara glas,  
ki u barku sida  
u morsko plavetnilo  
gleda.

*Emma Milišić, 8.r.*  
*Mentor: Velimir Pašara*



## **NEK' UTIHNE PISMA**

Na šentadi  
u ladu lipe stare  
čekan...  
Neće doći više  
tužnu pismu  
moja ruka piše.

Sama san,  
sidin na šentadi staroj  
ki da ničeg nima  
tek otpali list  
na daleki se put sprema.

Nek' utihne pisma  
moje je srce  
više ne sluša,  
uz tihu glazbu  
iz boli se budi  
moja duša.

*Ema Milišić, 8.r.*  
*Mentor: Velimir Pašara*

## **SLIKA NOĆI**

Ijadu zvizda  
i moja sjena,  
treptaj zvizda,  
ka' biserne oči,  
msec ka' srebreni  
osmih noći

*Ema Milišić, 8.r.*  
*Mentor: Velimir Pašara*

## **DA STE BAREN OPET TU**

Dok zvizde plante  
di su one noći  
di su dani  
ki se pante.

U konobi  
pisme više nima,  
di ste prijatelji moji  
večeras nevera se sprema.

Nevere života mog  
brodi naši ' više ni  
progutala i ' zla kob.

Da ste baren opet tu  
najdimo se  
u našen staren snu.

*Emma Milišić, 8.r.*  
*Mentor: Velimir Pašara*

## **PUTI SNA**

Oblaci bili  
ka' vičnost stojidu  
u trenu živu  
dok i' vitar ne razbaca.

Lišće mokro  
teško o' kiše  
poletiti bi tilo  
nestati  
u zagrljaju vitra.

Srića je traženje  
traženje na putu  
jednog sna.

*Emma Milišić, 8.r.*  
*Mentor: Velimir Pašara*

## STORIJA O STARON DUJI

Zazvonila zvona  
Rastvorile se škure  
Eto ti sa mora  
Starog barba Duje.  
"Ala, Duje! Jema li ča ribe?"  
Priupita Kate  
Uz dvi, tri beside.  
Slabo Kate, koja srdela i gira  
Jema bit da će ostat gladna gujica  
Nima njanci za kruva potoćat  
Čekat ću malo  
Kad će zanoćat  
Pa ću na peškafondo  
Dignit koju sipu  
Ma bit će meni  
Za večeru lipu.  
Ajde sad Kate  
Budi mi zbogon  
Jerbo gren doma  
Uvatit se posla!"  
Ma ajde Duje, ča se bojiš?  
Ne moreš nikad, brez tega ostat.  
Evo, taman san sa kleh mela  
Pa san došla i malo sela.  
Kvragu i posal  
Boje je sedit  
Nego se zbog posla od tega odilit! "

*Lucija Rinčić, 8.r.  
Mentor: Ivanka Zečević*



**OŠ Vladimir Nazor,**

**Postira**



*Nina Alajbeg : Riba, 6.r., OŠ Grohote*





## **KOGULE**

Kamen do kamena  
Po malo savure  
Slogali su naši stori  
I brojili ure

Počeli su godine  
Devetsto i pete  
Molili za pomoć  
Boga i sve svete

Puno dažja, groda  
Po njima je palo  
Nisu se pomakli  
Niti ni za malo

Stojidu i danas  
Krosidu nan misto  
Stoćedu do vika  
Vode nji je misto

*Josip Kušćević, 6.r.  
Mentor: Stipan Šandrk*

## MAŠKARE

U maškare se veseli,  
pivo, zabavije,  
a najveće se smije.  
Judi ko u osinjak dođe,  
zno se da kotal kroz  
bronzin makaruni prođe.

Tastamenot se čita,  
jemo puno beštimi  
za vega, nega,  
čak nega koji je vidi kita,  
koji je bi u Amerike i  
zajubi se u curu iz Splita.

Navečer, u disko se gre,  
proveselit se i pokupit nagrade.  
Birodu se maske sve,  
a najlipše su najboje.

Napleše se, napivo,  
da je to roj,  
a sada je mojoj  
pismi kroj.

*Paula Nejašmić, 6.r.  
Mentor: Stipan Šandrk*

## KUĆA KAMENA

Stoji sama,  
na brigu,  
ka čempris.  
Na vitru lipa,  
kišom oprana,  
Suncem opločana,  
drvenih ponistri,  
čuva ona,  
nike svoje misli.

*Mia Šušnjar, 8.r.  
Mentor: Stipan Šandrk*



*Gina Bilankov : Dvor, 6.r., OŠ Grohote*

## SNIG U MISTU

Niki don, vode je po snig  
i zobili je cili brig.

Napokon već nakon jednu 10 godin  
nad ovin Jadranskin moren modrin.

Ujutro se probudili,  
nismo se ni rič progovorit usudili,  
a već smo vonka bili,  
fola ti oven Bože mili...

Ala sad već nimon vrimena govorit sa tebon,  
moran poč u školu pratit čo nastavnik po ploči piše  
kredon..

A čin zazvoni odmor za pet minuti,  
gren na snig pri nego me sve to smuti  
i vo pameti će je još bokun imon cilu ne pomuti.


I tako su van, judi moji, dica se uživila,  
bila dobra i ništa ne bi skrivila.

Ali sve je to lipega trajalo jedon don,  
i onda...došlo je sunce i snig se otopi  
i oni lipi snješko cili se rastopi.

Či ćete...nimo ga već..  
valjda će opet doć,či ću van drugo reć.

*Doris Zinrajh, 8.r.  
Mentor: Stipan Šandrk*






*Petra Bezić: Zid, 8.r., OŠ Grohote*







## **MOJA PRVA PRIČA**

Balun je bija na vrhu brda. Tu je bila velika nizbrdica i fiju! odleti on nizbrdo. Evo ti vjeverice i dogura ga na vrh. Balun opet fiju! niz drugu stranu.

Eto i zeca pa oni guraj vamo , guraj tamo. A ja znan zašto je balun pada sa brda.

Tija je nač nekog dječaka da se poigra s njim na nogomet.

*Marin Petric 1.r.,  
Mentor: Blanka Ljubenkov  
OŠ Bol Split*



## MORE MOJE

Evo grmi. Prolije na sve strane, puše i siva. Sneveralo je i užgale se sve kolure ovega svita. A more pari ka da ga nima, stopilo se s nebon i čini se ka da će nas sve odnit, rasparat oli bacit na drugi kraj svita. Je, mogla san pisat o lipin plavin kolurima, o suncu i cvrčciman ča pivadu, al nisan. Triba se koji put i drukčije.

Nima ovod u Dalmaciji kuće oli su ritke di mora ni koga uzelo. I moj pradiđ Jure je osta u moru tamo u Bosporu di je naviga. Svake godine bacimo cviče s kraja i upalimo sviću. Kad god gren na more uvik pomislin da me did čuva. Ja u to virujen jerbo mi on dojde ka moj Bog mora.

Gledan s ponistre i pari ka da nevera pušta. Vali se bile sve manje, kaići ne tuču o rivu. Samo da ne laška ankora! Čin se stiša vaja mi isekat kaić i skupit tunje ča smo ono nočas armali. Jerbo je vrime od arbuni. Oma mi se omili ka se sitin kako je lipo kad se baca, cipa, tuče i kad ga onako lipa i crvena baciš pod provu. Ajme koji gušti!

Evo i sunce pa odma drukčije kolure prosipa po zadnjin valima ča se razbiju o sike. U daljini se crveni nebo, a to je sinjal da će noć bit mirna ka i dan ča će osvanit. Gren ja polako. Vaja partit jerbo plavetnilo me čeka, ka i moje samo meni znane pošte, sakrivene vale jer arbuni čekadu.

Vaja mi poč.

*Renata Delić, 6.r.  
Mentor: Mary Brkljača  
OŠ Dobri, Split*

## ŠETNJA GRADOM


Ča je lipo vidit moj Split. Čisti gušti!

Subotnje jutro. Gužvancija na peškariji u redu za frišku ribu, onda đir po rivi, gucaj kave, pa po slaju u pašticeriju.

Nedilja je. Najlipje je poč na misu u crikvu našega sv Duje i pomolit se za svoje grije. Onda lipo šotobraco do Marjana udahnit čiste arije i gledat s Vidilice grad. A ima se ča i vidit. Gren nazad priko Matejuške, čutin miris friškine. Volin đir priko rive, pa pazara, Peristila, pjace.

Ča bi reka stari Dioklecijan kad bi moga vidit današnji svit i šušur. Može bit da bi se bidan i pripa koliko je došlo nikoga novoga svita.

*Paola Macanović, 5.r.  
Mentor: Mary Brkljača  
OŠ Dobri, Split*



## MASLINA JE NEOBRANA

Misec je studeni ili jedanaesti kako ga zovu na mome otoku. To je misec kad se beru masline, a moj otac uvijek počinje brat 15. jedanaestoga.

Meni nije drago poč u masline, ali gren jerbo moj otac tako oće. Uvijek isti gremo brat: otac, mater, brat, sestra, barba Neven i baba. Kad dojdemo u poje i počnemo brat sve gre dobro dok mene ne „pukne žuta minuta“ jer me štufa brat pa počnen smetat i zafrkavat svih oko sebe. Oni na to „poludu“, a ja se ka štican i gren kod naših susidi. Njih zafrkajen ka i moje. Poslin kad se vratin mojima barba Neven se navije da ča san iša ča, da ča san čini ovo i ono...On ne razumi da je meni dosadno i da zato sve to činin : ča triba i ne triba.

Oko pet uri popodne počinje se pribirat masline, a meni se ni to ne da činit pa ja utečen. Sutradan me mater zbog toga kori i gnjavi, ali ja san lukav pa se izvučen tako šta spomenen barba Nevena koji me iživcira, a živcira i njih pa mi prođe lišo.

Kad mi mater tako počne pripovidat ja bi najradije uteka i iša igrat balun, ali to ne more tako, triba je slušat i mučat.

Sutradan se opet gre u masline i sve je isto ka i jučer, i ja san isti, i činin sve isto ka jučer.

~~Šta ću kad san taki i ne mogu se prominit!~~

*Mladen Zlendić, 7.r.*

*Mentor : Mirjana Stanić*


*OŠ Grohote, Grohote*



## NA STOLU KRUH

Niki don san dosa doma iz škole i već sa vrot me dočeka lipi vonj pečenica kruha. Brzo sam uleti u kužinu i vidi di mater vadi kruh iz špahera. Odma ga je butala na stol, a ja san ga onako teplega odma okini kus. Judi moji ča je bilo dobro! Dimilo se ka iz fumara iz sve četiri štruce. Mater mi je rekla da će me zabolit štumak od vrilega kruha. Ja san onda se na kalridu i gleda u one lipe štruce kako su natekle. Gleda san tako u kruh pa u mater pa opet u kruh i misli san, ajme blaga Božjega na stolu.

*Vedran Metikoš, 5.r.  
Mentor: Dubravka Manjak  
OŠ Milna, Milna*





## JEDON VIKEND PROVEDEN U ZASTRAŽIŠĆU NA OTOKU FORU

Jednoga pjetka poslijepodne jo i moj otac pošli smo na For. Ko i uvijek zjednja štacija namin je selo Zastrazišće. Stora kuća moga pokojnoga dida Stipeta dočekala nos je prozna i hlodna.

Zimska je štajun, slona se već čapala po zemji. Srića, parićali smo darva ovega lita. Odma san iša di su stivona i vaze naramak suhe česmine i malo vrisa da je lašnje užec ogonj. Dobro je, kuhinja se steplila. Iša san u konobu i iz karatila utoči čornega vina u bocun, jer otac bez tega ne more puojmit večeru.

Pripovida mi je, za večeron, kako je dok je on bi moli glavna spiza bila slona srdela i kupus začinjen maslinovin ujen. Posli bi se u ukrop od kupusa u pijat ulilo čornega vina i popilo na kraju večere.

Dogovor je po, za večeron, da ćemo ujutro poč u valu na južnu bondu di imamo ziemju, ribarsku kućicu i kaić. Tako je i bilo. Probudi me zoron. Otvorili smo škure, a vonka je još uvijek bi mrok. Od mista, na varhu, di ostavimo auto do vale imamo još pol ure hoda.

Zapartili smo svak svuoj rusak na škinu i portili nizbardo.


Ponovo očeva pripovidanja kako je bilo prin: “Gonilo se na mulima i tovarima. Kad bi došli u valu mulima bi se sapinjale parve noge, varvicon. To je zato da ne bi komu napravili šćetu po lozju.

Došli smo u valu. Sad triba parićat ort za na ribe. Parvo triba porinit kaić. To se čini priko darvenih polug koje triba nalojit ovčjin lojen da kaić boje gre u more. Dok je otac hićo mriže jo son šijo sa parićima da nas ne bi hitilo na kraj. Posli kad je pala noć užegli smo ferol, stavili ga na provu i išli podosti. Opet je mene tokalo ćapat se parićih i skoro cilu noć šijat. Opet pripovidanja kako se prin svitlilo sa lućen od bora i smole, ali je zato bilo puno veće ribe nego danas. Oko četiri ure ujutro vrotili smo se u valu. Bi son

martov umoran, ali se isplotilo. Bi je pun maštil huobotnica, starnje ribe i ugorih, a bilo je i par sipa. Posli smo digli mriže. U njima je bilo dosta ribe. Nojveće je bilo škarpunih, na moju žalost, jer me izbodu dok jih odinčitojen iz mriž. Naložili smo ogonj, da se napravi žerava. Svak je sebi izabra koliko more izist i ča hoće. Jo san sebi vaze dvo vela škarpuna. Otac ih je razriza niskost i stavi peć na gradikule. Njemu je draža bila sipa ispečena ucilo. Posli je sa svin čarnilon iskida na komadiće, začini ujen, papron i soli. Navečer smo se vrotili u misto. U nediju smo do puodne lavurali oko maslin. Jo san otukova mladikovce bistrakon, a otac je čisti po njiman.

Kad je pala noć tokalo nas je vrotit se u Split.  
Bi san puno kuntenat ča san vikend prove pomažući ocu.

*Stipe Zaninović, 8.r.  
Mentor: Milica Perdić  
OŠ Split 3*



## MEŠTROVICA O ŽIVOTA

Sitin se često svoje stare babe Ane, onod na ognjišću, kako krov peče. Je vonjalo, ma lipje od rusulice! Cilo bi misto znalo kad bi Ane krov pekla. +9

U onoj staroj šotani sa šudaron na glavi, a bidna škina iskrivljena od brimena ča je nosila.

E, a prin ni bilo ovako! Današnji judi ča god in triba, sidi u tonobil i donesi.

E, a Ane bi na leđa uprtila brime, u ruke vazela koju bočicu uja i kesicu smokav i ala, na pazar prodavat to po onome litnjem zvizdanu, za mrvu šoldi. Zato je danas ruvinana, a životni friži su duboki.


Ma koliko bi mi samo puti govorila: "Ćerce moja, samo lipu skulu završi, da budeš doturica oli profešurica! Na ponos svojoj babi."

A ja onako mala i vragolasta, ma to meni ni bilo na pameti. "Ala baba, pusti me s miron" mislila san.

A danas se s melankolijon u grudima sitin stare babe Ane. Kamo sriće da je više govorila i predavala mi svoje edukacije.

Moja baba Ane, ma ni skulu ni završila, a bila je meštrovica i po.

MEŠTROVICA O ŽIVOTA...




*Lucija Rinčić, 8.r.*

*Mentor: Ivanka Zečević*

*OŠ Vjekoslava Parača, Solin*

*Anton B.*





*Ivana Ćudina : Zid, 8.r., OŠ Grohote*



Prof. Ivanu Tokiću

## **DESETLJEĆE LJEPOTE KAO ISTINE**

*Nila Kuzmanić Svete*

Prohujalo je već desetak godina, ili kao što bi Antonija Miletić (mentorice Marine Čapalija) iz OŠ Skalice, Split, rekla Pasaju dani i godine/ i dohodi, evo, deseto lito – kako se jedan trio sretne ruke dosjetio na koji način, a po uzoru na Istru, gdje se čakavština njeguje i drži k'o malo vode na dlanu, potaknuti na pjesničko natjecanje osnovce s dalmatinskog priobalja i otoka. Gotovo sve zasluge što se ideja zavriježila idu nastavnicima i radnicima OŠ Grohote na Šolti, predvođenima ravnateljem Ivanom Tokićem. Pokazalo se da postoje nebrojeni zaljubljenici u govor predaka, koji su od davnine i naša pisana zavičajna baština. Uznastojali su, zatim, da se ova tribina pod geslom Ča-more-judi uključi u Marulićeve dane. Na stotine uradaka zaprimile su njihove marne ruke, podastirući one izabrane ocjenjivačkom sudu, da bi na koncu uredile i izdale svih deset zbornika.

Raduje taj golemi odaziv i činjenica da nagrađeni najmlađi i mladi pjesnici nastavljaju s objavljivanjem. Štoviše, došlo se i do tri ukoričene zbirke. Naime, oni svoju



zvizdu u poeziji nađoše i slidu je uvijek. Kao da je, poput kakve kraške ponornice, ta zapretana darovitost i ljubav prema zavičajnom jeziku - ta ljepota kao istina i istina kao ljepota - jedva dočekala biti izgovorena i zapisana. Kao da i nisu protekla stoljeća od Lekcionara Bernardina Splićanina i Konzul-Dalmatinove Biblije. U živom čakavskom jeziku koji, određen kretanjem Sunca i Mjeseca, traje do danas i nadahnjuje monumentalne spomenike našeg naroda – religijske i profane – od Marka Marulića do Zdravka Milišića.

Nakon Turističke zajednice Grada i Ministarstva kulture, jedna vriježa je dospjela i do Pazina i OŠ Vladimira Nazora koja se prošle godine uključila u takmičenje što se svih ovih devet godina završavalo u Nečujmu postavljanjem vijenca na kuću u kojoj je otac hrvatske književnosti proveo izgnanikom dvije godine, uprizorenjem djela iz njegova opusa, Marka Uvodića... i Vedrana Matošića u izvedbi šoltanskih osnovaca; i dakako dodjelom prigodnih darova pobjednicima. Od Pazinaca je potekla s oduševljenjem prihvaćena ideja da se susreti prošire na cijelo naše priobalje. Jedna od vriježa doletjela je i do HNK-Split te se ovi jubilarni, deseti, susreti održavaju na velikoj sceni nacionalnog teatra gdje će se okupiti svi dosadašnji pobjednici i njihovi vrijedni mentori-nastavnici hrvatskog jezika.

Možda je danas, u doba masovne komunikacije i globalizacije, od presudne važnosti što mlade osnovce nadahnjuje zavičaj. U potrazi za izvornim dopiru oni svojim stihovima do samog bića Mediterana, svjedočeći da se vječni motivi – more, sunce, hrid, galeb, maslina, vjetar, oblak, smokva... uskrisuju u svježim drukčijim metaforama, obojeni duhom i ozračjem nepresušne dalmatinske ekspresije. Ovdje gdje se more pini, jugo forcaje, najopojnije ih zauvijek obavija ne samo miris zrela mluna sa žuljevitih ruku dide moga nego i ruzmarina i levande, brnistre i lovora... Dojmljivi su prizori sastavnice melodiozna urbanoga i senzibilna težačkoga nerva, tema

prirode i lirskog subjekta.

Najupečatljivije jest novatorstvo i u umjetničkoj formi: osobitost stiha i stila, različitost jezičnih oblika unutar čakavice. Sari Belas, koja je otišla najdalje, uzor je Majakovski, drugima haiku poezija, ali uvijek s jakim osobnim pečatom. Konotacija je to bjeline kamena, blještavila sunca, na površini mora što poput bisera sija u svačijem oku.



*Nina Alajbeg : Riba, 6.r., OŠ Grohote*

## PEŠKARIJA

*Maja Blagaić*

Šjora Keka nosi ribu na peškariju. Dok slaže kašete na štand, sama sa sobon brontulaje.

**Keka:** Jo, Gospe moja ča se ovo dogaja – ovo će susvita. Ma danas se ne moreš ni na kogar pouzdat.

Dolazi šjor Pere i donosi svoju ribu.

**Pere:** Ča je šjora Keka, uvik ništo brontulaješ.

**Keka:** A di ti je dobro jutro, samo bi štucigava.

**Pere:** Ma ko te štucigaje. Je si li sad govorila sama sa sobon?

**Keka:** Jesan, pa ča. Cili svit je poludi, pa mogu i ja govorit ča me je voja i s kin me je voja.

**Pere:** A, jemaš prav. Vengo je li bilo ča svita?

**Keka:** Malo i ništa. Bidni judi, više ni zdravu spizu ne moredu kupit. Vengo slušaj, mogu li imat vire u te?

**Pere:** Moreš, a ča ti triba?

**Keka:** Ma tribala bi ništo na telefon nazvat nevistu.

**Pere:** Oli nimaš mobitel?

**Keka:** A, ne virujen ti ja u te moderne inštrumente. Oš mi pričuvat banak i prodat čagod ili ne? (ljutito)

**Pere:** Ča se idiš odma, vala Bogu da oću. Jesu li ti ribe na

istoj cini ka i dosad?

**Keka:** Jesu, eto gren ja i eto me za pet minuti. (Otišla je)

**Pere:** Evo friške ribe po povoljnim cinama. Ko će kupit?

Keka se vraća

**Keka:** Onda, jesi li mi ča proda?

**Pere:** Evo jesan, srdele.

**Keka:** E, bravo, a sad mi daj pineze.

**Pere** joj daje, ali manje.

**Keka:** Ča je ovo, pokre si me.

**Pere:** Ma nisan.

Policjot šeta u blizini peškarije.

**Keka:** Šjor policajac, brzo vamo.

Policjot odma dotrče.

**Policjot:** Ča se dogodilo šjora Keka?

**Keka:** Ma više nikomur ne moš virovat. Zamolila san šjor Peru da mi proda ribe i pričuva banak, dok ja gren na telefon.

**Policjot:** I, je li ča proda?

**Keka:** Je, ali mi ni da sve šolde.

**Policjot:** Šjor Pere, je li to istina?

**Pere:** Ma da san joj sve. ( namiguje policjotu )

**Keka:** Nisi, ne lažji.

**Policjot:** Ovo mora poč u zapisnik.

**Pere:** Ma nemojte šjor policajac, sve je ovo zezancija.

**Policjot:** Ma s menom se neš zafrkavat.

Izlazi kameraman sa kameron.

**Pere:** Eto, Keka moja ča su ti moderni inštrumenti.

**Keka:** Ma ča je tebi, koji inštrumenti? ( Krsti se )

**Policjot:** S dužnim poštovanjem, oli ste bokun pošempjali? Kakva je sad ovo kamera?

**Pere:** ( Kroz smij ) Kakva?, pa valjda skrivena.



**Keka:** Dat ću ja tebi skrivene kamere, toware jedan, da bi toware. Poštenu svit zafrkaješ. ( smij )

**Policjot** se nasmije i pokida zapisnik.

**Pere:** E, Keka moja eto san ti ulipša dan i bokun te nasmija, a i bit ćeš na tv-u.

**Keka:** Jel ti to mene opet malo...

**Pere:** Istinu ti govorin i još san tebi i sebi napravi reklamu.

**Keka:** E, vraže jedan. Moglo mi je i srce puknit od jida. Ali, svitu moj ipak nan ni sve tako crno u životu.

A, nas troje sad gremo na piće, ja častin. I znaš ča, možda ipak kupin oni mobitel, ( napravi par koraka ) a bome neću. Ovo bokun sriće ča ste mi priredili , ne more zaminit ni jedan mobitel.

*Igrokaz je napisala i za izvođenje na pjesničkoj smotri Ča-moje-judi pripremila Maja Blagaić, učiteljica glazbene klature OŠ Grohote*



*Hana Novaković : Riba, 6.r. OŠ Grohote*



*Tina Sule : Riba, 6.r. OŠ Grohote*

## **IGRAMO SE MORA**

*Tin Kolumbić*

*Igrokaz književnika Tina Kolumbića priredila na čakavici  
Mirjana Stanić, učiteljica hrvatskog jezika, OŠ Grohote*

U igrokazu sudjeluje : 5 djevojčica i 5 dječaka.

Djeca sjede bezvoljna, „ubila „ ih vrućina. Jedan dječak ih zadirkuje, ne da im mira, želi ih potaknuti na igru.

Šta ste se usidrili ka teretni brod? Ne mogu vas take



gledat! Izgledate ka krepane ribe.

Slušaj, nemoj nas vriđat! Ako se dignen, skakat ćeš u more.

To meni nije teško, ali ko će tebe dignit! Triba bi Veli Jože da te pomakne.

A, judi moji, čujete li vi njega? Ajde daje od nas, široka je riva. Ča si se prilipija uz nas ka prilipak.

Pusti ga, vidiš da mu je sunce udrilo u glavu.

Nije meni sunce udrilo u glavu, nego van. Ne mogu vas gledat tako krepane.

A ti Alene i Marine tu ste se prilipili uz te curice.

Je li ti krivo, je li ti krivo!?

Meni krivo? Da van pravo kažen, ja se ne bi moga zajubit u te krepane ribe!

(Djevojčice malo živnu.) Slušaj ti!

Oho, ipak ste se makle. Još malo pa ćete i ustat. More bit da ćemo se ipak poigrat!

Šta si toliko navalija da se igramo? A ča ćemo se igrat po ovoj vrućini? Koga je voja za bilo šta?

Čega ćemo se igrat? To bar nije problem! Pogledajte more, nikad ne miruje, uvijek se igra!

Šta onda, neka se igra, baš nas briga! Eto, ja baš ne ću i šta mi moš?

Ja gledan mire i uživam. I to je igra!

I ja uživam gledat more.

To je igra za linčine. Ajmo, dižite se! Ala, ajdemo!

(Podiže dvoje dječaka, zatim pokušava podignuti i ostale, jedino Rosana ostaje sjediti.)

Šta ćemo radit?

Zar nije lipše sidit?

Čekajte da najpri podignen ovi teretni brod !

(Zajedno s Marinom i Alenom podiže Rosanu dok ostali viču: Hooo-ruk!)

Ajde Josipe, govori na šta ćemo se igrat! Govori više!

Govori ili ćemo te bacit u more!

Polako, polako, igrat ćemo se mora!

Šta je tebi? Jesi li poludija? Kako ćemo se igrat mora?

Neka, neka! Kad oće da se igramo mora ja predlažen da Josip bude morski kukumar.

Dobro , ja san morski kukumar, a ti već jesi kopneni hvalisavac.

Ja ću bit morski jež, a ti od mene bjež! (Potrći prema nekome od njih.)

A ja ću bit morski pas. Sakrij se ili traži spas!

Znan! Sitila san se! Igrajmo se ribljeg pira. U ovoj kašeti ima moji slika...

E...(podiže iz kutije sliku meduze i stavlja je na majicu pomoću pribadača).

Ja san nježna i prozirna meduza. Moj rodni grad je slavna Ragusa. I kao slavna princeza tražin za virenika samo morskog kneza.

(Alen stavlja preko ramena ručnik i prilazi Rosani.)

Evo virenika iz Dubrovnika. Ja san pravi morski knez. Pogledaj samo moj kneževski plašt. Prepun je šara, nema ga lipšeg od Zadra do Hvara!

(Odlaze zajedno, a na njihovo mjesto dolazi Ivan.)

(Iz kutije vadi sliku morskog konjica i pričvrsti je na majicu.)

Ja san morski konjic koji morem jezdi, šaljem topli pozdrav jednoj morskoj zvizdi!

(Prilazi mu Nina . Uzima sliku morske zvijezde i pričvrsti je na majicu.)

Ja san lipotica mora , rodom iz Rogača. Zovu me i morska zvizda, al u more padoh iz nebeskog gnjizda.

Pruži mi draga svoj crveni krak. Požurimo u Maslinicu dok ne padne mrak.

(Povlače se zajedno!)

(Jelena uzima sliku girice i stavlja je na majicu.)

Ja san slatka gira iz Trogira i tražin simpatiju da me vodi u Opatiju.

(Josip uzima sliku cipla i stavlja ga na majicu.)

Evo simpatije koja će te odvest do Opatije. Ja san cipal s otoka Braca, samo molin da o našoj vezi ne bude cakule okolo.

(S Jelenom pod ruku sjedaju sa strane.)

(Darija uzima sliku komarče i stavlja je na majicu.)

Ja san elegantna komarča i meni se s puno žara udvara jedan ugor iz Hvara.

(Marin uzima sliku ugora.)

Ja san tvoj ugor iz Hvara i kažem svima da nema take ruže sve do Palagruže.

(Maja gleda u praznu kutiju i okreće je.)

Eee, izgleda da se ispraznilo naše morsko carstvo. Misli se.)

Ja bi mogla bit hobotnica!

(Dolaze Rosana i Alen, stanu iza Hane, pružaju ruke na suprotne strane pa izgleda kao da ima 8 krakova. Hana napravi zabrinuto lice.)

A da se zavučen u ovu rupu?

A da se svi zavučemo u pravo more!?

Tako je!

Pozdravja vas cipal!

Pozdravja vas knez.

Pozdravja vas komarča.

Ali i girica!

Ja ću odzviježditi.

Ja ću svoj in ugor skin puten.

(Svi zajedno ili naizmjenično.)

IGRAJMO SE SVEGA  
JER IGRA NAN TRIBA.  
MORE JE NAJBOJE SAD,  
MAŠTU NAN BUDI  
I DAJE NAN SVJEŽINU,  
ZADOVOLJSTVO I LAD.





**KAZALO**

*Marina Vidan : Zid, 8.r., OŠ Grohote*





## **Popis autora i radova**

### **POEZIJA**

#### **OŠ Bijaći**, Kaštel Novi

Čagalj, Ana : Maškare u Kaštilin, 8.r.

Jurić, Dolores : Baba moja, 8.r.

Mateta, Tea : Brat i ja, 8.r.

Mentor: Jelena Ljubić

Baričević, Nikolina : Penšijun, 6.r.

Grgin, Marija Magdalena : Ča je, je, 6.r.

Mentor: Lucija Carev

Mateta, Vice : Kome reć?, 6.r.,

Matijaš, Marija : Napuštena barka, 5.r.

Mentor: Ivanica Debak

#### **OŠ Bol**, Split

Alfirević, Emerciana : Prvoškolska brojalica, 1.r.

Kurtović, Marijan : Mačke u dvoru, 1.r.,

Mentor : Blanka Ljubenkov

#### **OŠ Dobri**, Split

Ćurković, Dominik : Litnje buđenje, 5.r.,

Kuzmičić, Magda : Moj sritni škoj, 6.r.,

Maretić, Mia : Moja ponos i dika, 5.r.,

Smoday, Vaniglia : Splite, javi se, 6.r.,

Smoday, Vaniglia : Moj galebe, 6.r.,

Šeparović, Ana : Fali mi stari Split, 8.r.,

Vojnović, Lucija : Mladi osmjeh moga Splita, 5.r.,

Mentor: Mary Brkljača

#### **OŠ Grohote**, Grohote

Alajbeg, Nina : Moj savršen svit, 6.r.,

Bogetić, Žana : Biser Jadrana, 5.r.,

Prvinić, Rosana : Šolta, 5.r.,

Mentor: Mirjana Stanić

#### **OŠ Hvar**, Hvar

Jurić, Bisera : Fortica, 7.r.,

Jurić, Bisera : Kaići, 7.r.,

Tudor, Ive : Molo grobje, 7.r.,

Mentor: Marinela Sarić

#### **OŠ Lučac**, Split

Hrepić, Antea : Snig, 5.r.,

Mentor: Ankica Kvartuč

**OŠ Majstor Radovan**, Trogir

Belas, Đana : Ća - jazik matere, 5.r.,

Belas, Đana : Moj brod, 5.r.,

Mentor: Marija Lučin

Belas, Sara: Skalinada, 8.r.,

Mentor: Tihana Mamut

**OŠ Milna**, Milna

Trevižan,. Leo Južina, 8.r.,

Trevižan,. Leo : Volin te, ma, 8.r.,

Mentor: Dubravka Menjak

**OŠ Pučišća**, Pučišća

Drpić,. Karla : Vîlà ol Jàdrana, 7.r.,

Nižetić, Ani : U nòninen škafètu, 7.r.,

Nižetić, Ani : Šāka zemji□, 7.r.,

Mentor: Marita Lasić

**OŠ Ravne Njive**, Split

Bratić, Lea : Moje lipo more, 5.r.,

Perković, Hana : Hvala ti, more, 5.r.,

Mentor: Daria Zlatar

**OŠ Slatine**, Slatine

Cipirita, Leo.: More, 8.r.,

Škrobica, Lucija : Život jednog težaka, 8.r.,

Mentor: Barbara Šuto

**OŠ Split 3**, Split

Bonković, Lucija : Moja kala, 4.r.,

Delaš, Lea : Dite Splita, 4.r.,

Galić, Lana : Bidni tić, 4.r.,

Kruna Bilić, Iva : Tić, 4.r.,

Lelas, Jakov Pavao : Rič po rič, 4.r.,

Pulić, Petra : Split na sv. Duju, 4.r.,

Romić, Dominik : Stara maslina, 4.r.,i

Vujević, Mia : Moja nona, 4.r.,

Mentor:Linda Koncani

Jerončić-Grba, Karlo : Fjaka, 6.r.,

Urlić, Petra : Moj lipi zavičaj, 6.r.,

Mentor: Neda Lelas

**OŠ Vis**, Vis

Bunčić, Tea : Nevrimè, 5.r.,

Gazija, Ivan : Dvi vale, 8.r.,

Ivičević Irena : Ribori, 5.r.,  
Lukšić, Marina : Moj Vis, 7.r., o  
Marić, Anamarija : Nevreme, 5.r.,  
Sablić, Ileana : Stagna, 6.r.,  
Udiljak, Vinko : Moj nono, 5.r.,  
Vidović, Tina : More, 5.r.,

Mentor: Srebrenka Beno

### **OŠ Vjekoslava Paraća, Solin**

Milišić, Ema : Čujen..., 8.r.,  
Milišić, Ema : Ča je bilo tega više ni, 8.r.,  
Milišić, Ema : Tišina, 8.r.,  
Milišić, Ema : Nek' utihne pisma, 8.r.,  
Milišić, Ema : Da ste baren opet tu, 8.r.,  
Milišić, Ema : Slika noći, 8.r., Mentor:  
Milišić, Ema : Puti sna, 8.r.,

Mentor: Velimir Pašara

Rinčić, Lucija : Štorija o staron Duji, 8.r.,

Mentor: Ivanka Zečević

### **Vladimir Nazor, Postira**

Kušćević, Josip : Kolgule, 6.r.,  
Nejašmić, Paula : Maškare, 6.r.,  
Šušnjar, Mia : Kuća kamena, 8.r.,  
Zinrajh, Doris : Snig u mistu, 8.r.,

Mentor: Stipan Šandrk

## **PROZA**

Marin Petric : .Moja prva priča, 1.r., OŠ Bol Split

Mentor: Blanka Ljubenkov

Renata Delić : More moje, 6.r., OŠ Dobri, Split

Paola Macanović : Šetnja gradom, 5.r., OŠ Dobri, Split

Mentor: Mary Brkljača

Mladen Zlendić : Maslina je neobrana, 7.r., OŠ Grohote,

Grohote

Mentor : Mirjana Stanić

Vedran Metikoš : Na stolu kruh, 5.r., OŠ Milna, Milna

Mentor: Dubravka Manjak

Stipe Zaninović : Jedon vikend proveden u Zastrazišću  
na otoku Foru, 8.r., OŠ Split 3; Mentor: Milica Perdić

Lucija Rinčić : Meštrovica o života , 8.r.

OŠ Vjekoslava Paraća, Solin; Mentor: Ivanka Zečević

## **Popis likovnih radova**

Iris Mihovilović, Zid, 8.r.  
Paola Grbić: Riba, 8.r.  
Paola Grbić: Napuštena barka, 8.r.  
Ivana Čudina : Riba, 8.r.  
Paola Grbić : Riba, 8.r.  
Jelena Brković : Riba, 6.r.  
Paola Grbić : Moj galebe, 8.r.  
Gina Bilankov : Šoltanski dvor, 6.r.  
Tina Sule : Riba, 6.r.  
Hana Novaković : Riba, 6.r.  
Darija Popović : Riba, 6.r.  
Jelena Brković : Riba, 6.r.  
Paola Grbić : Ča, jezik matere, 8.r.  
Paola Grbić : Moj brod, 8.r.  
Paola Grbić : Riba, 8.r.  
Paola Grbić : Južina, 8r.  
Paola Grbić : Volin te, ma, 8.r.  
Petra Bezić : Riba, 8r.  
Rosana Prvinić : Riba, 5.r.  
Mary Buktenica : Riba, 8.r.  
Rosana Prvinić : Riba, 5.r.  
Nina Alajbeg : Riba, 6.r.  
Paola Grbić : Nevtime, 8.r.  
Paola Grbić : Stagna, 8.r.  
Anton Burić : Riba, 8.r.  
Nina Alajbeg : Riba, 6.r.  
Gina Bilankov : Dvor, 6.r.  
Petra Bezić : Zid, 8.r.  
Ivana Čudina : Zid, 8.r.  
Nina Alajbeg : Riba, 6.r.  
Hana Novaković : Riba , 6.r.  
Tina Sule : Riba, 6.r.  
Marina Vidan : Zid, 8.r.

*Članovi Likovne grupe OŠ Grohote*

*Voditelj: Anica Bašić, učitelj likovne kulture*

## Sadržaj

POEZIJA .....	10
OŠ Bijaći, Kaštel Novi .....	11
OŠ Bol, Split .....	19
OŠ Dobri, Split . .....	23
OŠ Grohote, Grohote . .....	31
OŠ Hvar, Hvar .....	37
OŠ Lučac, Split .....	41
OŠ Majstora Radovana, Trogir ...	45
OŠ Milna, Milna .....	51
OŠ Pučišća, Pučišća .....	59
OŠ Ravne Njive, Split .....	65
OŠ Slatine, Slatine .....	69
OŠ Split 3, Split .....	73
OŠ Vis, Vis .....	85
OŠ Vjekoslav Parać, Solin .....	95
OŠ Vladimir Nazor, Postira .....	105
PROZA .....	111
DODATAK .....	121
Mila Kuzmanić Svete	
Desetljeće ljepote kao istine .....	122
Maja Blagaić	
Peškarija : igrokaz .....	125
Tin Kolumbić	
Igramo se mora .....	128
(igrokaz na čakavici priredila Mirjana Stanić)	
Kazalo .....	133



OŠ Grohote  
Grohote, Šolta

Tisak  
Oxa d.o.o

Možda je danas, u doba masovne komunikacije i globalizacije, od presudne važnosti što mlade osnovce nadahnjuje zavičaj. U potrazi za izvornim dopiru oni svojim stihovima do samog bića Mediterana, svjedočeći da se vječni motivi – more, sunce, hrid, galeb, maslina, vjetar, oblak, smokva... uskrisuju u svježim drukčijim metaforama, obojeni duhom i ozračjem nepresušne dalmatinske ekspresije. Ovdje gdje se more pini, jugo forcaje, najopojnije ih zauvijek obavija ne samo miris zrela mluna sa žuljevitih ruku dide moga nego i ruzmarina i levande, brnistre i lovora...

*Nilu Kuzmanić Svete*

Oš Grohote  
Grohote, Šolta  
2009

ISSN 1845-4852